

Dem Durchlauchtigsten Hoch=  
gebornen Fürsten vnd Herrn Herrn Augusto/ Herzogen zu  
Sachsen / des heiligen Römischen Reichs Erzmarschalhn vnd Chur=  
fürsten / Landgraffen in Düringen / Marggraffen zu Meissen / vnd Burg=  
graffen zu Magdeburg / etc. Meinem gnedigsten Herrn.

**D**urchlauchtigster Hochgeborner gnedigster  
Churfürst vñ Herr / E. G. F. G. seind meine schuldige diens=  
te / mit allem trewen vleis in vnterthenigkeit jederzeit zuuorn /  
Gnedigster Churfürst vnd Herr / Vnter viel andern Hoch=  
fürstlichen gaben vnd tugenden / damit E. G. F. G. von  
Gott reichlich gezieret / ist dis nicht die geringste / das  
E. G. F. G. sonderlich auch zu der Musica, als einer edlen Kunst vnd beson=  
dern gabe Gottes / ganz gnedigste zuneigung vnd liebe tragen / vnd gegen  
derselben mit allen gnaden sich erweisen / Sintemal für E. G. F. G. als ein  
weiser verstendiger Fürst vñ Regent selbst (Gott lobbe) wissen vnd verstehen /  
das diese löbliche Kunst fürnemlichen zu Gottes Ehren diene / vñ nechst dem  
heiligen Predigampt / jederzeit auch für ein sonder Ornamentum oder zier  
der Kirchen / darinnen man von dem einigen ewigen Gott rein lehret / han=  
delt / vnd singet / bey allen Christen gehalten worden.